

Broj: SI 3 Iž 030956 18 Iž
Sarajevo;05.10.2018.godine

Sud Bosne i Hercegovine, u drugostepenom vijeću sastavljenom od sudija dr. Branko Morait kao predsjednika vijeća, Dinke Bešlagić-Čovrk i Mirsade Džindo kao članova vijeća, odlučujući o žalbi političkog subjekta KOALICIJA SRPSKA DEMOKRATSKA STRANKA (SDS-SRSRS-SRS) potpisana od strane lica ovlaštenog za zastupanje koalicije Neđe Kapurana i Ivanke Marković, izjavljenoj protiv Odluke o II izmjeni Odluke broj 05-1-07-1-1274-1/18 od 22.10.2018. godine o utvrđivanju i objavljivanju rezultata Općih izbora u Bosni i Hercegovini 2018. Godine, u nejavnoj sjednici, održanoj dana 05.10.2018. godine, donio je

RJEŠENJE

Žalba se odbacuje kao nedopuštena.

Obrazloženje

Odlukom Centralne izborne komisije Bosne i Hercegovine, broj i datum navedeni u uvodu izmijenjena je (II put) Odluka broj: 05-1-07-1-1274-1/18 od 22.10.2018. godine o utvrđivanju i objavljivanju rezultata Općih izbora u Bosni i Hercegovini na način što je stavom (1) izuzetno od utvrđenih rezultata u odluci broj: 05-1-07-1-1274-1/18 od 22.10.2018. godine o utvrđivanju i objavljivanju rezultata Općih izbora u Bosni i Hercegovini 2018. godine u dijelu Izvještaja o rezultatima glasanja za nivo 300 Narodna skupština Republike Srpske:

- za političkog subjekta 02372 – Srpska demokratska stranka – (SDS-SRSRS-SRS), 3. mandat na kompenzacijskoj listi na kojem se nalazi kandidat Mihajilica Milanko (Srbin) dodjeljuje se kandidatu istog političkog subjekta na 4. mjestu iste kompenzacijske liste, Bukejlović Nini,

- za političkog subjekta 00515 – Savez nezavisnih socijaldemokrata – SNSD, 4. mandat na kompenzacijskoj listi na kojem se nalazi kandidat Vuković Radovan (Srbin) dodjeljuje se kandidatu istog političkog subjekta na 49. mjestu iste kandidacijske liste, Kovačević Sanji.

Stavom (2) utvrđeno je da predmetna Odluka stupa na snagu danom donošenja i objavit će se 29.10.2018. godine na internet stranici Centralne izborne komisije Bosne i Hercegovine www.izbori.ba, i smatrat će se da je

danom objavljivanja ista dostavljena strankama-učesnicima iz stava (1) ove odluke.

Žalitelj je blagovremeno uložio žalbu ističući da je Odlukom povrijeđena odredba člana 11.6 (2) i to na štetu SRS RS kao jednog od koalicionih partnera SDS-a i SRS-a. Nadalje, ukazuje da je Nina Bukejlović na lokalnim izborima 2016. godine bila kandidat za skupštinu opštine grada Doboj kao kandidat pod imenom i prezimenom Nina Prešić, te je izabrana za odbornika, ali se tada izjašnjavala kao lice srpske nacionalnosti, dok se na izborima 2018. godine izjasnila kao bošnjakinja. Ukazuje na Odluku Ustavnog suda BiH broj: AP 66/15 od 10.02.2015. godine kojom je zauzet stav da su nedozvoljene apelacije apelanata koji su mijenjali izjašnjenje o pripadnosti konstitutivnom narodu ili grupi Ostalih u toku izbornog ciklusa, kao što je to slučaj i sa Ninom Bukejlović, a što je u suprotnosti sa članom 4.19 (6) Izbornog zakona BiH. Sumarno, Nina Bukejlović je promjenom nacionalnog izjašnjenja u toku izbornog ciklusa dovela do zloupotrebe prava u korist jednog lica i na štetu drugih. Zbog toga predlaže da Sud preinači Odluku CIK-a BiH na način da se za političkog subjekta 02372 – Srpska demokratska stranka – (SDS-SRSRS-SRS), treći mandat na kompenzacijskoj listi dodijeli u skladu sa odredbom člana 11.6 stav 2 Izbornog zakona kandidatu koji je predstavnik relevantnog naroda sa kompenzacione liste, tj. Ivanki Marković kao predstavniku hrvatskog naroda.

U odgovoru na žalbu Centralna izborna komisija Bosne i Hercegovine predložila je da Sud predmetnu žalbu odbije kao neosnovanu. Ovo jer je kandidatkinja Nina Bukejlović bila kandidat za NSRS, tj. donji dom a za šta nije uslov izjašnjenje o pripadnosti konstitutivnom narodu. U prilog takvoj činjenici ide da se čak i kandidatima za NSRS koji se ne izjasne o pripadnosti konstitutivnom narodu, te ako su izabrani uredno ovjeravaju mandati. Dakle, izjašnjenje o pripadnosti konstitutivnom narodu ili grupi ostalih u smislu Izbornog zakona se koristi samo ako je to osnov za ostvarivanje prava na izabranu odnosno imenovanu poziciju. NSRS nije tijelo za koje je potrebno ispuniti taj uslov, ali to jesu gornji domovi, npr: Vijeće naroda, pa se samo izjašnjavanje cijeni kod imenovanja(izbora u ta tijela. Zbog toga je CIK BiH ovjerio ovoj kandidatkinji kandidaturu za izbore za NSRS kao bošnjakinji, iz razloga jer nacionalno izjašnjenje nije uslov za imenovanje i izbor u NSRS.

Žalba nije dopuštena.

Nakon uvida u predmet broj SI 3 IŽ 030949 18 IŽ od 02. U 11.2018. godine utvrđeno je da je u navedenom predmetu Apelaciono vijeće Suda BiH

odlučivalo o žalbi istog političkog subjekta na istu odluku CIK BiH, iz istih razloga.

Uvidom u spis utvrđeno je da je žalbu uložio politički subjekt Srpska demokratska stranka (SDS-SRS RS-SRS) dana 31.10.2018. godine u 14.35 koju je potpisao ovlaštenu predstavnik koalicije Neđo Kapuran, po kojoj je odlučivano u već navedenom predmetu 02.11.2018. godine.

Istog dana navedeni politički subjekt je (Koalicija Srpska demokratska stranka) u isto vrijeme uložio predmetnu žalbu čiji podnosilac žalbe je Ivanka Marković, a lice ovlašteno za zastupanje koalicije u potpisu Neđo Kapuran, pa je jedino prihvatljivo da je žalbu ponovo izjavio politički subjekt u smislu odredbe člana 6.3 stav (1) Izbornog zakona BiH.

S obzirom, da je već donijeta odluka Apelacionog vijeća po istoj Odluci CIK-a koje je već raspravilo prvu žalbu navedenog političkog subjekta, pa kako se radi o presuđenoj stvari, to apelaciono vijeće zaključuje da politički subjekt nema pravnog interesa za podnošenje i druge žalbe identičnog sadržaja, zbog čega je žalba nedopuštena, u smislu člana 180 stav 3 Zakona o parničnom postupku pred Sudom BiH (Sl. glasnik BiH br. 36/04 sa izmjenama). Stoga je primjenom odredbe člana 191 stav 1 tačka 1 citiranog zakona valjalo žalbu odbaciti, odredbe kojeg zakona se shodno primjenjuju kako je to propisano članom 60 a) Zakona o upravnim sporovima Bosne i Hercegovine (Sl.glasnik BiH broj 19/02 do 83/08).

**PREDSJEDNIK VIJEĆA
SUDIJA
Morait dr. Branko**